


CUMIEGN SALOUF

**LESCHA DA FONS, ALPS E
PASTGIRAS**



A. Basa legala

Art. 1

Scopo

La lescha preschainta intenziunescha la cultivaziun persistente da fons, pastgiras ed alps digl cumegn politic da Salouf.

Sen igls basigns digl territori e digl turissem duess neir piglia risguard an duevla maniera.

Art. 2

Survigilaziun

La suprastanza communal survigilescha l'observanza dalla lescha preschainta. Igl schef digl rom ò la survigilanza sur dad alps e pastgiras.

Cun singuls pensums d'execuziun son neir incumbensos igl tgea d'alp u oters funcziunaris da cumegn.

B. Fatgs da fons

Art. 3

Scumond da fons

Igl zappar ainten pros esters è scumando durant la perioda da flurizun digl 1. da matg anfignen igls 30 da settember. La suprastanza communal so concluder divergenzas schi fò basigns.

Art. 4

Carrar segl fons

Igl carrar cun vehichels da tot gener segl fons durant igl taimp da flurizun è scumando a nunautoris. Durant igl rest digl taimp dastga neir caro segl fons angal an cass mutivos.

Art. 5

Bual

Sen territori communal è igl bual scumando per biestga grossa e manedla.

Art 6

Correr liber dad animals

Igls possessours dad animals da tgesa on da procurar tgi lour animals geian betg ramandond. Igl lascher correr liber gaglignas sen territori ester è betg lubia sainza expressiva autorizaziun.

Igls excrements da tgangs èn da deponer ainten igls Robby-Dogs mess a disposiziun digl cumegn.

Art. 7

Veias e sendas

Las veias communalas èn da neir mantigneidas sobras. Siva d'aveir lado e mano puschigna èn las veias tschuffas da neir nattedas digl caschunader.

C. Fatgs d'alps e pastgiras

Art. 8

Territori da pastgiras

Igl territori da pastgiras digl cumegn è partia aint an pastgira da premaveira e pastgira d'aton, scu an pastgira d'alp.

Igls territoris da pastgira èn cunfinos tenor igl plan da zavrada da gòts e pastgiras. Igl plan cun la descripziun detagleda dallas pastgiras da premaveira e dallas pastgiras d'aton è part integrada da chella lescha.

Art. 9

Affitaziun territoris da pastgiras

Las pastgiras e las alps digl cumegn da Salouf son neir affitadas a corporaziuns d'alp u a tals tgi cargian l'alp. Sur dall'affitaziun decida la suprastanza communal. An cass tgi nign fittadign digl li s'interessescha, son er fittadigns esters neir risguardos.

Statets e reglamaints digls fittadigns d'alps e pastgirs (*corporaziun d'alp*) on da neir approvos dalla suprastanza communal.

Art. 10

Adiever da pastgiras

Igl dretg d'adiever on tots pours tgi abiteschan aint igl cumegn da Salouf, aint igl rom dalla lescha da vischnancas cantunala (*Art. 30 e 31*).

Vign l'occupaziun normala betg nizigeida, so ulterioura biestga estra neir acceptada per alpager.

Vadels sur 6 meis vignan da prancepi alpageas angal schi els èn castros. Excepziuns son neir concedidas digl schef digl rom, per tors da tratga e per vadels da vatgas mamma e vatgas nutreidras.

Art 11

Taimps d'adiever

L'antschatta dalla pasculaziun da premaveira decidan chels tgi cargian las alps sezs. La fejn dalla pasculaziun da premaveira dependa dalla cargeda dallas alps.

La pasculaziun d'aton antscheva cun la scargeda dallas alps e cozza anfignen igl pi tard igls 30 d'otgover.

Art. 12

Alps da cumegn

La repartiziun da pastgiras ed alps sen igls divers movels vign fatga da chels tgi cargian las alps, siva d'aveir consulto igl schef digl rom.

Art. 13

Seivs

Per lung dallas veias da passagi da movel, èn mintgamai chels tgi mettan lour movel a pascular ubliias da far seiv. Las seivs temporaras èn d'allontanar siva tgi la pasculaziun digl movel è a fegn.

Sen las pastgiras da cumegn èn las seivs d'electric d'allontanar igl pi tard 10 deis siva tgi la pasculaziun è a fegn.

Sen las pastgiras d'alp èn alla fegn dall'alpaziun las seivs temporaras da neir allontanadas u da neir messas an en stadi tgi caschungan nign prieveil.

Veias e sendas dastgan betg neir saradas giu cun seivs fermas u feildaroms. Passadis per pedungs e vehichels on da neir garantias da tot taimp.

Art. 14

Taxas da pastgiras

Pigl adiever da pastgiras ed alps pretenda igl cumegn taxas da pastgira u tschains da fittanza.

Art. 15

Lavour cumegna

Tals tgi pasculeschan lour movel sen pastgira da premaveira u d'aton, scu er sen las pastgiras d'alp, on da far lavour cumegna. La lavour cumegna ò da neir prestada uscheia tgi la productivitat vign mantigneida.

Igls tgeas d'alp fixeschan cun igl schef digl rom anfignen igl 1. da matg en program da lavour per la lavour cumegna annuala.

Art. 16

Dismessa da cadavers

La dismessa digls cadavers è tgossa digls proprietaris digls animals. Igl cumegn surpeglia nigns costs per la dismessa da cadavers.

D. Disposiziuns penalas

Art. 17

Casteis

Cuntravenziuns ancunter chella lescha da fons, alps e pastgiras vignan puneidas cun casteis anfignen 1'000.- fr.

An cass da repetiziuns vignan igls casteis dublos.

E. Disposiziuns finalas

Art. 18

Cumpetenzas suprastanza communal

An cass, noua tgi chella lescha cuntigna nignas u betg avonda determinaziuns, è la suprastanza communal autorisada da decider e relascher determinaziuns executoricas.

Art. 19

Recurs

Recurs ancunter ordinaziuns digl schef digl rom, sa basond sen chella lescha, èn d'inoltrar an terma da 20 deis siva la communicaziun alla suprastanza communal.

Recurs ancunter ordinaziuns dalla suprastanza communal èn d'inoltrar, observond en termin da 20 deis, alla dertgira administrativa digl cantun Grischun.


Art. 20

Antrada an vigour

Chella lescha aintra an vigour siva dall'approvaziun dalla radunanza communal e ramplazza tot las anteriouras leschas da fons, alps e pastgiras digl cumegn da Salouf ed ulteriouras decisiuns dalla radunanza communal. Tottas anteriouras ordinaziuns tgi scunterdeian a chella lescha vignan an chel mument annulladas.

Approvaziun dalla radunanza communal igls 15 da december 2010.

Igl president:



Giatgen Peder Fontana

La dertgira:



Sandra Baltermia-Guetg